

IziNtshumayelo zokuSebenzelana ekuZwaneni

47/2015 Intshumayelo ngesonto 15 emva komkhosi wobuThathwemunye, ngomhla ka 13. 09. 2015

Egameni likaNkulunkulu onguYise, neNdodana, noMoya oNgcwele.

Izwi elongamela leliviki, lilotshiwe ku-1 Pet. 5:7, lithi:

IziNtshumayelo zokuSebenzelana ekuZwaneni

47/2015 Intshumayelo ngesonto 15 emva komkhosi wobuThathwemunye, ngomhla ka 13. 09. 2015

Egameni likaNkulunkulu onguYise, neNdodana, noMoya oNgcwele.

Izwi elongamela leliviki, lilotshiwe ku-1 Pet. 5:7, lithi: "Niphonse izinkathazo zenu zonke phezu kwakhe, ngokuba yena uyanikhathalela!"

1. Iculo 165/176
2. Umkhuleko: Nkulunkulu, Mdali noBaba wethu sonke, uyasuthisa izinyoni zezulu, uhlobisa utshani nezimbali zasendle, awuyikukhohlwa nempela abantwana bakho. Siyanxusa, sisize sibe namandla, siqine ekukholweni ukuba sinikele kuwe ngokwethemba umzimba nomphefumulo, sifune kakhulu umuso wakho kuqala, ngomusa wakho okhona njalo-njalo kuze kube phakade. Amen.
3. Izwi leTestamente elidala lilotshiwe kuGen 2:4-15;
Iphistola ngohlelo lwesibili lilotshiwe ku-1 Pet. 5:5c-11;
Ivangeli ngohlelo lwesithathu lilotshiwe Luka 18:28-30.
4. Isivumo senkolo: Ngiyakholwa nguNkulunkulu uYise ...
5. Iculo 241/206

6. Umkhuleko wakhe ofundayo intshumayelo

7. Ivangeli ngohlelo lokuqala lilotshiwe ku-Math. 6:24-34, ethi: "Akakho ongakhonza amakhosi amabili. Ngokuba uyakuzonda enye, athande enye, noma abambelele kwenye, adelele enye, Ningekhonze uNkulunkulu noMamona. Ngelokho-ke ngithi kini: Ningakhathazeki ngokuphila kwenu ukuthi niyakudlani noma niyakuphuzani, nangomzimba wenu ukuthi niyakwembathani. Ukuphila akukukhulu kunokudla nomzimba kunesambatho na? Bukani izinyoni zezulu ukuthi azihlwanyeli, azivuni, azibekeleli ezinqolobanini; nokho uYihlo wasezulwini uyazondla. Nina kanizidluli kakhulu na? Ngumuphi kini ongelekela ebudeni bakhe ingalo ibenye ngokukhathazeka na? Nikhathazekelani ngesambatho na? Qaphelani iminduze yasendle ukuthi imila kanjani; kayikhandleki, kayiphothi; kepha ngithi kini: NoSolomoni ebukhazikhazini bakhe bonke wayengembathisile okomunye wayo. Uma uNkulunkulu embathisa njalo utshani basendle obukhona namuhla, ngomuso buphonswe eziko, akayikunembathisa kakhulu nina eninokukholwa okuncane na? Ngakho-ke ningakhathazeki nithi: Siyakudlani? noma: Siyakuphuzani? noma: Siyakwembathani na? Ngokuba konke lokhu abezizwe bayakufunisisa; ingani uYihlo wasezulwini uyazi ukuthi niyakudinga konke lokhu. Kodwa funani kuqala umbuso kaNkulunkulu nokulunga kwakhe, khona konke lokhu kuyakwenezelwa nina. Ningakhathazeki ngengomuso, ngokuba ingomuso iyakukhathalela okwayo. Inkathazo yosuku yanele lona." Amen.

8. Intshumayelo: Nina bathandekayo eNkosini, lamazwi evangeli lanamuhla athathwa entshumayelweni yasentabeni, lapho uJesu ebatshela bonke ababemuzwayo ngombuso wakhe. UJohane uMbhapathizi, wamlandela uJesu indlela yokushumayela izwi elikhaliphile: Phendukani, ngokuba umbuso wezulu ususondele. NoJesu waqala umsebenzi wakhe ngalamazwi. Umbuso womthetho weTestamente elidala uyaphuma emthunzini uyaqhubeka uya ekukhanyeni okuphelele. Uyena uJesu osikhipha ekuqalekiswa komthetho, ebugqileni, ukuba sibe ngabantwana bakaNkulunkulu.

Thina-ke makholwa, singabantwana bakaNkulunkulu ngombhaphizo, singenile embusweni wakhe. Sivumele uJesu abe yiNkosi yethu. Ivangeli lanamhla liyasibuza

ngombuzo omkhulu: Izinkathazo nizehlula kanjani na? Ningazehlula lapha:

1. Simvuma yena uJesu kuphela, abe-yiNkosi yethu.

2. Ngoba izinkathazo azilingani namandla akhe,

3. Ngakho lokhu funani umbuso kaNkulunkulu nokulunga kwakhe!

1. Singabantwana bombuso kaJesu. Kodwa singabantu futhi abasemhlabeni. Inhlalo emhlabeni kuyinhlalo ezinkathazweni. Akuphikeki lokho. Pho, izinkathazo zisenze njani? UJesu ubeka izwi elingaphikekei futhi: Akakho ongakhonza amakhosi amabili, noma angahlakanipha kanjani, noma angafuna amasu anjani, ngokuba uyakuzonda enye, athande enye enhliziyweni yakhe, noma abambelele kwenye, adele enye ezenzweni zakhe. Nina enithi ningabantwana bakaNkulunkulu: Ningekhonze uNkulunkulu noMamona. UMamona ungokomhlaba, izwe nokusezweni, imfuyo yezinkomo, nemali konke okufisekayo ezweni, nodumo kubantu. Amakhosi amabili: UNkulunkulu noMamona, ayafuna ukuba uwakhonze ngenhliziyo yakho yonke. Ngoba bakhona abathi bangakhonza bobabili kanyekanye. Siyazi ukuthi akwenzeki. Imibuso yabo ayihlangani, iyamelana. Othanda izwe nezinkanuko zasezweni ulwa noNkulunkulu, futhi othanda uNkulunkulu ngeke agijimele izangoma. Uzakuthanda enye, uzonde enye. Lowo ombonayo ukuthi uyakusiza, nguyena ozakumkhonza. Awunamandla okubakhonza kanyekanye. Akwenzeki. Ungazikohlisi. Lapha ungumntwana kaNkulunkulu, uzibize phambi kwabantu ukuthi ulikholwa, awunamandla akuvumeke ukuba uthokoze nezono. Sekuyakhanya. Umuntu angakhonza inkosi inye kuphela. Asikhethe kahle. Yileyonkonzo inengcino yayo. Ukuguqukela lenkosi namhla, kusasa ngihambela lenye, akunakukusiza. Uzakukuvuna ukufa. Sizakuzehlula kanjani izinkathazo na? Ngokumkhetha yena uJesu, abe yiNkosi yethu kuphela.

2. Sesizakuyifunda indaba yezinkathazo. UJesu uyaqhubeka uthi kulabo abakhethe uNkulunkulu: Ngelokho-ke ngithi kini: "Ningakhathazeki ngokuphila kwenu ukuthi niyakudlani noma niyakuphuzani, nangomzimba wenu ukuthi niyakwembathani. Ukuphila akukukhulu kunokudla nomzimba kunesambatho na?" Kanti izinkathazo

ziyizono ngokwazo na? Ukhona umuntu ongenazo izinkathazo na? Lapha sekuthwese ihlobo , awukhathaleli ukulima amasimu akho na? Lapha umntanakho elambile awukhathaleli ukumfunela ukudla na? Lapha egodole, awumfuneli izambatho na? Ikhona inhlukano phakathi kwezinkathazo nezinkathazo. Ngokungena kwesono emhlabeni uNkulunkulu wabeka usizi phezu kwabantu. Wathi kuAdamu: Umhlabathi uqalekisiwe ngenxa yakho. Uyakudla kuwo ngokukhathazeka zonke izinsuku zokuhamba kwakho. Izinkathazo akuyizo izono ngokwazo, kodwa silandela izono. Ngoba uAdamu wona, zangena izinkathazo. Inhlalo lapha emhlabeni kuyinhlo ezikathazweni, ngoba sonile sonke. Kungalokho-ke silima, sinovalo ukuthi sothola ukuvuna na? Sothola ukudla na? Sizothola izambatho na? Ngakho-ke lapho kungena inkonzo kaMamona. Sesithi: Ake sisebenze ngamasu amaningi nezindlela ezihlakaniphile, ukuba sifuye sithole izimpahla eziningi ezizakusisiza, singakhathazeki. Sesiyizinceku zikaMamona.

UJesu uthini? UYihlo wasezulwini uyazondla izinyoni. UNkulunkulu uyembathisa utshani basendle. Awunamandla ukuyeleka ubude bengalo ibenye ebudeni bakho, ihora lilinye, ngithini, iminithi lilinye empilweni yakho ngokukhathazeka kwakho. Qhabo! Uzisho ukuthi ungumntwana kaNkulunkulu. Phonsa zonke izinkathazo kuNkulunkulu uBaba. Ngoba nguyena ohlula zonke izinkathazo.

3. Ngakho lokhu funani umbuso kaNkulunkulu nokulunga kwakhe kuqala, khona konke lokhu kuyakwenzelelwa nina. Abezizwe, abantu abangakholiwe, bathi konke kuyazivelela. Thina-makholwa esingabantwana bakaBaba osezulwini siyazi ukuthi kunguBaba osezulwini ophumisa ilanga lakhe phezu kwababi nabahle, anise imvula phezu kwabalungileyo nabangalungile. Sibocela kuye ukuba abusise umsebenzi wethu, ukuba sidle, siphuze, sigqoke, lokhu singabantwana bakhe. Izinkathazo zibesihlupha ngenxa yezono zethu, kodwa zingabobusa phezu kwethu. Sigijimele njalo kuBaba, ngoba yena uyazi esikudingayo.

Izinkathazo zomhlaba singasehlula kuphela, lapha simvulela yena uJesu kuphela, abe yiNkosi yethu, ngoba yena ngamandla akhe ayazihlula zonke. Sifune-ke umbuso wakhe, silondolozeke kuwo. Amen.

9. Umkhuleko: Nkosi, Nkulunkulu Mninimandla-onke, sibonga umusa wakho, ngoba usasipha konke esikuswelayo ekuhambeni kwethu imihla ngemihla. Siyacela kuwe: Ungasamuki isibusiso sakho, noma singasifanele. Sivikele kuso isangabe nasekukhonzeni uMamona. Sisize thina-bantwana bakho, ukuba uMamona lo esimsebenzisa onke amalanga, angawatholi amandla okusihlukanisa nawe, kodwa sibuse phezu kwakho konke okusikhathaza nokusilibazisa, kungasidukisi. Sisize sikhonze, sethembe wena wedwa, wena kuphela, ube yiNkosi yethu. Siphe uMoya wakho ukuba sifune umbuso kaNkulunkulu nokulunga kwakhe, size singene kulombuso waphakade ngomusa wakho okhona njalo-njalo kuze-kube phakade. Amen.

Umkhuleko weNkosi: Baba wethu osezulwini ...

10. Iculo 145/173

Ukuthula kukaNkulunkulu okudlula ukuqonda konke makulondoloze izinhliziyu zenu nemicabango yenu kuKristu Jesu. Amen.

Lentshumayelo ilotshiwe ngo-1967 ngu-C. Johannes (†).

Ukucindezelwa nokuthunywa kwezintshumayelo kuyasekelwa yinhlangano ethiwa: Lutheran Heritage Foundation.